

Rā 17 o NOEMA i te mata'iti 2022

Te turanga 'ōu te ka turu atu i te tamariki, te anoano pakari ra i te tauturu

- **HON JAN TINETTI**

Kua 'akakite mai te Associate Minister of Education, a Jan Tinette i teia rā e, te 'irinaki nei te Kavamani, i te 'akapapa'anga i teta'i turanga tauturu, te turu meitaki atu ra i ta tatou tamariki, e te māpu tamariki, e anoano pakari ra i te tauturu.

Koi oti ua ake nei te 'Ākara'anga-matatio i te Anoano Tauturu e 'Inangaro Pakari ia nei, tei 'akamata'ia i roto ia 'Āperīra, i te mata'iti 2021, e kua tae mai e 1100 au mānakonako'anga.

"I te āru'anga atu i te au manakonako'anga tei tuku'ia mai no runga i te 'ākara'anga-matatio," te karanga nei a Jan Tinetti e, "kua 'akatika te Kavamani ki teta'i āka tauī'anga, i te 'akapāpu kia 'āpi'i meitaki ia ta tatou aronga tāmou 'āpi'i, te anoano pakari ra i te tauturu.

"E pou ana e \$1.2 billion i te au mata'iti tātakita'i ki runga i te turu i te tāmou'anga 'āpi'i, inā ra, kua kite matou e, mei muatanga ana mai, te nga'anga'ā o te turu no te aronga e anoano pakari ra i te tauturu, e kare e rauka ana te turu no ta tatou tamariki, e te māpu tamariki me anoano ratou i te tuātau e anoano'ia ra.

"I te 'akapāpu kia 'anga'anga meitaki te turanga turu, ka 'akatupu'ia teta'i rāvenga kā'iro'iro'ia, te ka 'anga i te 'anga'anga'anga taōkota'i i rotopu i te tauira, to ratou kōpu tangata, e te turanga 'āpi'i punanga, me kore ra, 'āpi'i. Ka 'ōronga teia ki te au tauira, e te kōpu tangata, te 'iki'iki'anga ma'ata atu, e te 'aka'aere i te turanga o te turu, e te mea pu'apinga rava atu no ratou 'uā'orāi," i na Jan Tinetti ei.

"Ko te 'akatanotano'anga meitaki atu, i te turu no te aronga tāmou 'āpi'i e anoano pakari ra i te tauturu, teta'i mea pu'apinga rava atu, i roto i te Learning Support Action Plan 2019-25, a te Kavamani.

Tei roto i te turanga 'ōu, e 'itu pi'a-patu no te tauī'anga:

1. Teta'i rāvenga 'ōu no te tā'anga'anga i te turanga 'ōu;
2. Te au turu'anga tei 'akatanotano'ia no teta'i anake;
3. Teta'i 'ātuitui'anga 'āpi'i te 'anga'anga ta'okota'i ra, e te 'ārikiriki;
4. Te au turu'anga tāmou 'āpi'i, no te au tauira Māori, e to te Moana-nui-o-Kiva, e to ratou whānau, e to ratou au kōpu tangata, tei 'akatupu'ia e te Māori, e te aronga no te Moana-nui-o-Kiva;
5. Teta'i pupu tangata-'anga'anga tukatau e te mātūtū, te ka rave meitaki i te 'anga'anga;
6. Teta'i turanga pūtē-moni, no te turu i teta'i rāvenga tei 'akatanotano'ia, e te māmā i te rave; e te
7. 'Anga'anga ta'okota'i'anga pakari atu, ki roto i teta'i atu au turanga tauturu.

"E mātūtū te au pi'a-patu, e au tauī'anga tau ki te roa'anga-tuātau, te ka 'inangaro i te tuātau no te 'akatupu'anga e te rave'anga kia pu'apinga, e te pūtē-moni 'ōu na roto i te tuātau.

Ka 'anga'anga ta'okota'i te Māraurau o te Pae 'Āpi'i, ki roto i te Whaikaha, i te 'akapapa e te 'akatupu i te turanga 'ōu, e ka ripōti atu ki te Minita, i rotopu i teia mata'iti e tu mai nei.

"No runga teia i te 'akatupu'anga i te tauī'anga motukore. I roto i teta'i tuātau poto ua, i te turanga 'ōu e 'akapapa'ia nei, ka 'akapu'apinga mai te Māraurau o te Pae 'Āpi'i i te turanga tauturu e vai nei, kia māmā mai i te tamariki, e to ratou kōpu tangata, i te kimi turu me anoano ratou.

“Ka turu katoa ia te au pu’āpi’i, kia rave i te professional learning and development, i te ‘akapu’apinga atu i to ratou karape e te mātūtū, i te turu’anga i te tamariki e anoano pakari ra i te tauturu.

“Te ‘inangaro nei au i te ‘akameitaki i te katoatoa – pērā katoa te au metua, te au pu’āpi’i, te au pupu pakipakitai, e teta’i atu au putuputu’anga, e pērā katoa te Advisory Group – tei tomo mai ki roto i te rāvenga ‘ākara’anga-matatio. E tuku’anga manako ‘inangaro rava ia atu teia,” i na Jan Tinetti ei.

No te tatau atu i te Highest Needs Review stakeholder voice report, tei ‘akatupu’ia e NZCER:
link <https://www.education.govt.nz/highest-needs-change-programme>